

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

Broj: 02-02-177/99
Sarajevo, 3.12.1999.god.

Z A P I S N I K

**s 9. sjednice Doma naroda Parlamentarne skupštine Bosne i Hercegovine, održane 6.10.
i 3.12.1999. godine**

Sjednica je počela s radom u 12,35 sati.

Sjednicom je predsjedavao Izet Žigić, predsjedavajući Doma naroda Parlamentarne skupštine Bosne i Hercegovine.

Svi delegati su prisustvovali sjednici doma.

Sjednici je bio prisutan i Mirsad Kurtović, ministar vanjske trgovine i ekonomskih odnosa.

Nakon što je predsjedavajući konstatirao da sjednici prisustvuju svi delegati predložio je sljedeći

DNEVNI RED

1. Prijedlog zakona o reviziji institucija Bosne i Hercegovine,
2. Prijedlog zakona o rješavanju problema 2000. godine u Bosni i Hercegovini,
3. Davanje saglasnosti na ratifikaciju sporazuma o vazdušnom saobraćaju između Vijeća ministara BiH i Austrijske federalne vlade,
4. Delegatska pitanja i odgovori.
5. Prijedlog zakona o imigraciji i azilu Bosne i Hercegovine,

Predloženi dnevni red jednoglasno je usvojen s Zaključkom da se Prijedlog zakona o imigraciji i azilu Bosne i Hercegovine razmatra nakon što će ga razmatrati Predstavnički dom Parlamentarne skupštine BiH.

Ad.1. Prijedlog zakona o reviziji institucija Bosne i Hercegovine

U raspravi po ovoj tački dnevnog reda učestvovali su: Momir Malić, Mugdim Herceg, Vladimir Šoljić, Vinko Zorić, Pero Marković, Mirsad Kurtović i Dževad Mlaćo.

Nakon rasprave prvo se glasalo o amandmanima koji su usvojeni na Predstavničkom domu a koji se odnose na sljedeće:

- naziv zakona se mijenja i glasi: "ZAKON O REVIZIJI FINANSIJSOG POSLOVANJA INSTITUCIJA BOSNE I HERCEGOVINE"
- u članu 2. izraz značenja "institucija" riječi "znači vlada" zamjenjuju se riječima: "znači sve institucije BiH utvrđene Ustavom BiH i zakonom" a preostali dio teksta se nastavlja
- u članu 2. u izrazu značenja "revizija učinka" riječ "rada" zamjenjuju se riječju "polovanja"
- u članu 2. na kraju teksta se dodaje: "vlada" znači Predsjedništvo, Vijeće ministara, ministarstva i druga izvršna tijela BiH"
- član 40 se briše

Amandmani su jednoglasno usvojeni.

Nakon glasanja o amandmanima glasalo se o Zakonu.

Zakona je usvojen jednoglasno.

Ad.2. Prijedlog zakona o rješavanju problema 2000. godine u Bosni i Hercegovini

U raspravi niko nije učestvovao te se odmah prešlo na glasanje.

Prvo se glasalo o amandmanima koji su usvojeni na Predstavničkom domu a koji se odnose na sljedeće:

- naziv zakona se mijenja i glasi: "ZAKON Y2K"
- član 1. mijenja se i glasi: "Zakon o Y2K (Zakon o rješavanju problema usklađivanja rada računara 2000 godine u BiH u daljem tekstu: Zakon), odnosi se na svaku informatičku, elektronsku, telekomunikacijsku i kompjutersku opremu koja se instalira u Bosni i Hercegovini kod korisnika definiranih u članu 5. ovog zakona".
- član 2. mijenja se i glasi: "ovaj zakon se primjenjuje na teritoriji Bosne i Hercegovine"
- u članu 3. alineja 4. riječi "nacionalni plan" zamjenjuju se riječima "BiH plan"
- član 12. mijenja se i glasi: "ovaj zakon stupa na snagu osmog dana od dana objavljivanja u Službenom glasniku BiH, a objavit će se i u službenim glasilima entiteta".

Amandmani su jednoglasno usvojeni.

Nakon glasanja o amandmanima glasalo se o Zakonu.

Zakon je usvojen jednoglasno.

Ad.3. Davanje saglasnosti na ratifikaciju sporazuma o vazdušnom saobraćaju između Vijeća ministara BiH i Austrijske federalne vlade

Sobzirom na to o ovoj tački dnevnog reda nije niko učestvovao u raspravi odmah se prešlo na glasanje.

Saglasnosti na ratifikaciju sporazuma o vazdušnom saobraćaju između Vijeća ministara BiH i Austrijske federalne vlade data je jednoglasno.

Ad.4. Delegatska pitanja

Delegat Mugdim Herceg postavio je sljedeća pitanja:

1. Koliko se stranih državljana s pasošem BiH nalazi na listama Interpola i poimenice tko su ta lica?
2. Koliko je izdato pasoša stranim državljanima po entitetima, odnosno u Federaciji BiH po kantonima?
3. Iz kojih država su lica kojima je dato bosanskohercegovačko državljanstvo i koliko ih je?
4. Koliko stranih državljana s bosanskohercegovačkim pasošem živi na određenim područjima BiH, odnosno entitetima?
5. Da li Bosna i Hercegovina ima zaključene bilateralne odnose s zemljama iz koji su strani državljanima s bosanskohercegovačkim pasošem i da li su tim odnosima regulirana pitanja dvojnog državljanstva?

U kontekstu ovih pitanja delegat Mugdim Herceg pokrenuo je i inicijativu da se od Upravnog odbora za implementaciju mira u BiH zatraži preduzimanje hitnih i efikasnih mjera na discipliniranju tijela vlasti u izdavanju putnih isprava, odnosno pasoša i striktno provođenje Zakona o državljanstvu, a koji je objavljen u "Službenom glasniku" br. 13/99, kao i utvrđenih obaveza u skladu sa Odlukom o osnivanju Komisije za razmatranje statusa lica naturaliziranih poslije 6. aprila 1992. godine.

Istovremeno je delegat Mugdim Herceg je inicirao da Vijeće ministara pokrene rješavanje socijalnih prava porodica u Bosni i Hercegovini čiji su članovi na radu u inostranstvu.

Sjednica je prekinula s radom u 12,20 sati

* * *

Sjednica je nastavila s radom 3. 12. 1999. godine.

U nastavku sjednice bilo je prisutno 10 delegata

Sa nastavka sjednice odsustvovali su Vinko Zorić, Momir Malić i Pajić Đoko.

Nastavku sjednice prisustvovao je Nudžeim Rečica, zamjenik ministra civilnih poslova i komunikacija.

Ad.5. Prijedlog zakona o imigraciji i azilu Bosne i Hercegovine

U raspravi je učestvovali Ivo Živković, Momir Tošić i Nudžeim Rečica

Nakon rasprave prešlo se na glasanje.

Zakona o imigraciji i azilu Bosne i Hercegovine usvojen je jednoglasno.

U sklopu ove tačke dnevnog reda jednoglasno je usvojen sljedeći zaključak kojeg je predložio delegat Momir Tošić : Da Dom naroda Parlamentarne skupštine Bosne i Hercegovine traži od Vijeća ministara da u skladu sa članom 7. Stav 2. , članom 10. Stav 6. I članom 13. Zakona o imigraciji i azilu Bosne i Hercegovine ubrza aktivnosti i uđe u proces uspostavljanja posebnog režima ulaska građana SRJ i Republike Hrvatske na principima jednakopravnosti građana i naroda.

Sjednica je završila s radom u 12,15 sati.

Magnetofonski snimak čini sastavni dio Zapisnika.

PREDSJEDAVAJUĆI
DOMA NARODA
PARLAMENTARNE SKUPŠTINE BiH
dr. Izet Žigić